

## 每週經課朗誦經文(巴克禮台語漢字)2013/08/25

### 共同經課 - 1 耶利米書一章四節~十節

4 耶和華的話臨到我講：5 我未創造你佇腹肚內的代先，我識你；你未出胎的代先，我分別你做聖；設立你做列國的先知。6 我就講：嘻啊！主耶和華啊，你看，我袂曉講，因為我是囡仔。7 總是耶和華對我講：你毋通講我是囡仔，因為我見有差你，你著去；我見有吩咐你，你著講。8 你莫得驚 in，因為我及你佇啲，欲救你。這是耶和華講的。9 耶和華就伸伊的手摸我的嘴，耶和華給我講：你看，我有將我的話下佇你的嘴。10 看啊，今仔日我設立你佇列邦列國的頂面，是為著欲拔出、欲拆毀、欲敗壞、欲摔倒，欲建立、欲栽培。

### 共同經課 - 2 詩篇七十一篇一節~六節

1 耶和華啊，我倚靠你；求你互我永永無見誚！2 照你的公義拯救我，互我脫離；俯耳孔聽我，來救我！3 求你做我通倚起的石磐，互我常常去踎遐；你已經命令欲救我，因為你是我的山巖，我的山寨。4 我的上帝啊，求你救我脫離歹人的手，脫離不義及殘忍的人的手頭。5 因為主——耶和華，你是我所向望的；對我少年的時，你是我所倚靠的。6 我對胎裡互你扶持；互我出老母的腹肚的是你。我欲常常謳啫你！

### 共同經課 - 3 希伯來書十二章十八節~二十九節

18 今恁所到的毋是會摸得；有火焰的山、及密雲、黑暗、大風、19 號頭的音、言語的聲。聽見的人，求莫得閣及 in 講；20 因為所命令的，in 當袂住，是講：「就若走獸倚著山，也著用石頭擲死。」21 閣所看見極其通驚，致到摩西講：「我不止驚到愕愕悞。」22 獨獨恁所到的就是郇山，真活上帝的城，天頂的耶路撒冷。23 萬萬的天使，許個有名記佇天裡的大子的聚會及公會，審判眾人的上帝得著齊全的義人的靈魂，24 新約的中保耶穌，及所灑的血；此個血所講的比亞伯卡好。25 謹慎，莫得拒絕對恁講的。因為，佇地裡來傳命令的，若拒絕伊，尙且袂會逃閃，何況咱違背對天傳命令的啊？26 當時伊的聲互地振動，若是今有應允講：「猶有一擺我毋若互地搖茁，亦欲互天搖茁。」27 所講猶有一擺，是指明受振動的物，就是受造的物欲抵著遷徙，互許個無受振動的長長佇啲。28 所以咱得著袂會振動的國，著有恩惠，通用虔誠、敬畏來服事，互上帝歡喜。29 因為咱的上帝就是炎炎的火。

### 共同經課 - 4 路加福音十三章十節~十七節

10 安息日，耶穌佇一個會堂啲教示人。11 抵當有一個婦仁人患著邪神，致病十八年久，瘡痍攏袂伸直。12 耶穌看見，就叫伊講：「婦仁人啊，今你脫離你的病啦！」13 就用雙手給伊按；伊即時伸直，就歸榮光上帝。14 管會堂的因為耶穌佇安息日醫病，就受氣對眾人應講：「有六日應該著做工；彼六日間通來受醫，安息日毋通。」15 若是主應伊講：「假好的人啊，佇安息日恁豈無逐人對槽裡解伊的牛，抑是驢，牽去食水嗎？16 此個婦仁人是亞伯拉罕的後裔，互撒但縛伊已經十八年久，豈毋應該佇安息的日解伊的結嗎？」17 耶穌講按呢，諸個對敵攏見誚；眾人因為伊所行一切榮光的事，攏總歡喜。